

Na osnovu čl. 10. i 12. Zakona o udruženjima i fondacijama Bosne i Hercegovine, ("Službeni glasnik BiH", br. 32/01, 42/03, 63/08, 76/11 i 94/16), Skupština Udruženja kriminalista, kriminologa i menadžera sigurnosti na sjednici održanoj dana **26.08.2019.** godine u Sarajevu, donijela je

## **STATUT**

### ***Udruženja kriminalista, kriminologa i menadžera sigurnosti***

#### **I OPŠTE ODREDBE**

##### **Član 1.**

U skladu sa članom 12. Zakona o udruženjima i fondacijama Bosne i Hercegovine (u daljem tekstu: Zakon) ovim Statutom propisuje se sljedeće:

- puni i skraćeni naziv, sjedište i adresa Udruženja;
- ciljevi i djelatnosti Udruženja;
- postupak za primanje i isključivanje članova;
- organi udruženja, postupak i način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove skupštinu, uslovi i način raspuštanja odnosno prestanka rada;
- postupak za izmjene i dopune Statuta, ovlaštenja i donošenje drugih opštih akata Udruženja;
- javnost rada;
- pravila za ostvarivanje, korištenje i raspolaganje sredstvima Udruženja, kao i organ koji je ovlašten za nadzor nad korištenjem tih sredstava;
- opis oblika i sadržaja pečata i znaka Udruženja;
- zastupanje Udruženja;
- uslovi i postupak spajanja ili podjele u drugo udruženje i prestanak rada;
- postupak za raspolaganje preostalim imovinom ili drugim sredstvima, u slučaju raspuštanja ili prestanka rada Udruženja;
- podnošenje izvještaja o finansijskom poslovanju i radu Udruženja;
- ostala pitanja u vezi rada i djelovanja udruženja u skladu sa Zakonom i ovim Statutom.

##### **Član 2.**

Udruženje kriminalista, kriminologa i menadžera sigurnosti (u daljem tekstu: Udruženje) je dobrovoljna, nevladina, nestranačka organizacija osnovana radi ostvarivanja interesa i ciljeva članova Udruženja.

### **Član 3.**

Udruženje stiče svojstvo pravnog lica sa pravima obavezama i odgovornostima danom upisa u registar kod Ministarstva pravde Bosne i Hercegovine.

### **Član 4.**

Udruženje djeluje na cijelom području Bosne i Hercegovine.

## **II NAZIV, SJEDIŠTE I PODRUČJE DJELOVANJA**

### **Član 5.**

#### **Puni naziv Udruženja je:**

Udruženje kriminalista, kriminologa i menadžera sigurnosti

Udruga kriminalista, kriminologa i menadžera sigurnosti

Удружење криминалиста, криминолога и менаџера сигурности

#### **Skraćeni naziv Udruženja je:**

Udruženje „KKMS“

Udruga „KKMS“

Удружење „ККМС“

Puni naziv Udruženja službeno se koristi na latinici i ćirilici.

#### **Naziv Udruženja na engleskom jeziku glasi:**

Association of Criminalists, Criminologists and Security Managers

#### **Skraćeni naziv na engleskom jeziku glasi:**

Association „CCSM“

### **Član 6.**

Sjedište Udruženja je u Sarajevu, ulica Zmaja od Bosne 8.

## Član 7.

Udruženje može promijeniti naziv, sjedište i znak Udruženja, a odluku o tome donosi Skupština Udruženja u skladu sa Zakonom i ovim Statutom.

### III CILJEVI I DJELATNOSTI

## Član 8.

Ciljevi i djelatnosti Udruženja su:

- okupljanje kriminalista, kriminologa i menadžera sigurnosti u cilju zaštite i unapređenja profesionalnih i etičkih standarda struke;
- Razvoj stručnih, naučnih, administrativnih, ekonomskih, socijalnih, kulturnih, sportskih, humanitarnih, inovacijskih, dobrovoljnih aktivnosti, te zadovoljavanje drugih potreba i interesa članova Udruženja u skladu sa Zakonom;
- podrška u cilju obezbjeđenja stručnog i profesionalnog usavršavanja članova Udruženja;
- pomoć u sistematskom, multidisciplinarnom i interdisciplinarnom proučavanju kriminaliteta u svrhu primjene i dizajniranja specifične naučne metodologije za proučavanje problema u toj oblasti;
- promocija profesije kriminalista, kriminologa i menadžera sigurnosti;
- poticanje na rad i organizovanje edukativnih i konsultativnih programa za buduće kriminaliste, kriminologe i menadžera sigurnosti, koji se nalaze na relevantnim visokoškolskim ustanovama;
- saradnja sa visokoobrazovnim institucijama, naučnim i stručnim organizacijama i drugim institucijama za koje se može vezati profesija kriminaliste, kriminologa i/ili menadžera sigurnosti i saradnja sa drugim srodnim organizacijama i udruženjima iz zemlje i inostranstva, koji se zalažu za iste ciljeve i načela;
- Provođenje naučnih i stručnih projekata od značaja za Bosnu i Hercegovinu, evropsku i svjetsku zajednicu;
- Saradnja sa sredstvima javnog informisanja, sudjelovanje u različitim manifestacijama interesno povezanih sa ciljevima i djelatnostima Udruženja;
- Razvijanje međusobnih kontakata, informacija i iskustava i provođenje aktivnosti u oblastima koje su interesno povezane sa ciljevima i djelatnostima Udruženja;
- Izdaje knjige, brošure, biltene i druge publikacije radi ostvarivanja ciljeva Udruženja u skladu sa Zakonom;
- Organizira okrugle stolove, konferencije, naučno-istraživačke projekte, te druge prikladne aktivnosti radi ostvarivanja ciljeva Udruženja na nivou Bosne i Hercegovine, kao i na međunarodnom nivou u skladu sa Zakonom i Statutom;
- Organizira volonterski rad u svrhu ostvarivanja ciljeva Udruženja;

## **Član 9.**

Udruženje može imati svoje kancelarije ili podružnice izvan sjedišta Udruženja na cijeloj teritoriji Bosne i Hercegovine, koje nemaju svojstvo pravnog lica;  
Odluku o otvaranju kancelarija ili podružnica donosi Skupština Udruženja natpolovičnom većinom svih članova.

## **IV ORGANI UDRUŽENJA**

### **Član 10.**

Organi Udruženja su:

1. Skupština;
2. Predsjednik i zamjenik predsjednika Udruženja;
3. Sekretar Udruženja;
4. Sud časti.

## **SKUPŠTINA**

### **Član 11.**

Skupština je organ upravljanja Udruženja, koju čine svi članovi Udruženja, sa jednakim pravom glasa.

Radom Skupštine rukovodi predsjednik Skupštine, a kojeg bira i razrješava Skupština Udruženja.

Mandat predsjednika Skupštine traje četiri godine sa mogućnošću reizbora.

### **Član 12.**

Predsjednik Skupštine može biti razriješen dužnosti prije isteka mandata iz člana 12. stav 3. ovog Statuta i to:

- na sopstveni zahtjev;
- ako pravilno ne obavlja poslove i zadatke Predsjednika Skupštine;
- u drugim slučajevima predviđenim Zakonom i ovim Statutom.

Inicijativu za razrješenje Predsjednika Skupštine može dati 1/3 članova Skupštine, kao i predsjednik Udruženja.

### **Član 13.**

Skupština Udruženja može biti:

- redovna;
- tematska;
- vanredna.

Redovna skupština se sastaje po potrebi, a najmanje jednom u toku kalendarske godine i ima za cilj kontrolu rada putem razmatranja godišnjeg izvještaja o radu Udruženja.

Tematska skupština se sastaje u slučaju potrebe raspravljanja o posebnim pitanjima koje se odnose na ciljeve i djelatnosti Udruženja.

Vanredna skupština saziva se izuzetno, u slučaju nepredviđenih poteškoća u radu, poremećaja međuljudskih odnosa u organizaciji ili drugih okolnosti kada je ugrožen rad i vitalni interesi Udruženja, na zahtjev 1/3 članova Skupštine Udruženja, kao i predsjednika Udruženja.

Način rada Skupštine pobliže se utvrđuje Poslovníkom o radu Skupštine Udruženja.

### **Član 14.**

Skupštinu saziva predsjednik Skupštine najkasnije 7 dana prije njenog održavanja.

Predsjednik Skupštine je dužan sazvati Skupštinu u slučaju kada to zahtjeva najmanje 1/3 članova Skupštine ili kada to zatraži predsjednik Udruženja.

### **Član 15.**

Radom sjednice Skupštine rukovodi predsjednik Skupštine.

Skupština bira zapisničara na početku rada sjednice koji vodi zapisnik.

Zapisnik mora da odražava bitan tok rada i suštinu svih odluka i stavova.

Predsjednik Skupštine:

- se stara o organizovanju Skupštine i saziva njene sjednice;
- predlaže dnevni red sjednice;
- predsjedava sjednicama Skupštine;
- potpisuje akte donesene na Skupštini;
- stara se o izvršenju odluka, zaključaka i drugih akata Skupštine;
- vrši i druge poslove koje mu odredi Skupština u skladu sa Zakonom i ovim Statutom.

### **Član 16.**

Skupština radi i odlučuje u skladu sa Statutom i Poslovníkom o radu.

Kvorum Skupštine je 1/3 svih članova Skupštine Udruženja.

Skupština punovažno odlučuje natpolovičnom većinom prisutnih članova Skupštine Udruženja, ukoliko ovim Statutom nije drugačije određeno, odnosno da je za određena pitanja potrebna kvalifikovana većina.

Glasanje na sjednici je javno, izuzev ukoliko Skupština na samoj sjednici ne utvrdi drugačije.

## **Član 17.**

Skupština u svojoj nadležnosti donosi:

- Statut Udruženja, njegove izmjene i dopune i druge opšte akte određene Statutom,
- odlučuje o pripajanju ili podjeli u drugo udruženje i prestanku rada Udruženja;
- donosi poslovnik o radu Skupštine;
- bira Predsjednika Skupštine, predsjednika i zamjenika predsjednika Udruženja, sekretara Udruženja i Sud časti;
- imenuje i razrješava organe upravljanja Udruženjem;
- usvaja godišnji program i plan rada Udruženja;
- usvaja izvještaje o radu i finasijski izvještaj kojeg su pripremili predsjednik Udruženja i zamjenik predsjednika Udruženja;
- donosi odluku o visini i načinu plaćanja članarine;
- donosi odluku o ovlaštenim licima za zastupanje Udruženja;
- usvaja završni račun;
- daje autentično tumačenje ovoga Statuta;
- djeluje kao drugostepeno tijelo u žalbenom postupku;
- donosi odluku o prestanku rada Udruženja;
- razmatra i usvaja izvještaje o radu Udruženja, koje podnose predsjednik Udruženja i zamjenik predsjednika Udruženja;
- donosi odluku o obrazovanju komisija i radnih tijela Udruženja;
- donosi odluku o znaku Udruženja;
- odlučuje o proglašenju počasnih članova Udruženja;
- donosi odluku o otvaranju kancelarija - podružnica u skladu sa Zakonom i ovim Statutom;
- donosi odluku o promjeni naziva, sjedišta i znaka Udruženja;
- obavlja druge poslove koji nisu stavljeni u nadležnost drugih organa Udruženja.

## **PREDSJEDNIK I ZAMJENIK PREDSJEDNIKA UDRUŽENJA**

### **Član 18.**

Poslovima i aktivnostima Udruženja upravljaju predsjednik Udruženja, koga imenuje i razrješava Skupština, u skladu sa ovim Statutom.

Mandat predsjednika Udruženja je 4 (četiri) godine sa mogućnošću reizbora.

### **Član 19.**

Predsjednik Udruženja za svoj rad je odgovoran Skupštini u skladu sa zakonskim propisima, ovim Statutom i drugim aktima Udruženja.

## **Član 20.**

Predsjednik Udruženja ima sljedeća prava, dužnosti i odgovornosti:

- zastupa Udruženje u pravnom prometu;
- provodi politiku i druge odluke koje je donijela Skupština;
- izvršava finansijski plan;
- provodi poslovanje i donose odluke u okviru programa rada i planova razvoja Udruženja;
- određuje izvedbene planove i radne zadatke;
- odgovoran je za zakonitost i poslovanje Udruženja;
- priprema i predlaže donošenje svih akata iz nadležnosti Skupštine Udruženja;
- donosi opšte akte, izuzev onih koji su u izričitoj nadležnosti Skupštine;
- prati realizaciju finansijskog plana Udruženja;
- izvršava odluke Skupštine;
- upravlja imovinom Udruženja;
- stara se o Statutu Udruženja, godišnjem i polugodišnjem obračunu poslovanja Udruženja, zapisnike i odluke Skupštine, predsjednika Udruženja, akti tekuće korespondencije i drugi akti vezani za rad i poslovanje Udruženja;
- ima i druga prava i obaveze utvrđene Zakonom, opštim aktima Udruženja, i koje im stavi u nadležnost Skupština Udruženja.

## **Član 21.**

Predsjednik Udruženja može biti razriješen dužnosti prije isteka vremena na koje je imenovan i to:

- na sopstveni zahtjev;
- ako pravilno ne obavlja poslove i zadatke;
- u drugim slučajevima predviđenim Zakonom i ovim Statutom.

Inicijativu za razrješenje predsjednika Udruženja može dati 1/3 članova Skupštine.

Predsjednik Udruženja je ovlašten da donosi odluke po svim pitanjima koja se odnose na tekuću aktivnost Udruženja, izuzev pitanja koja spadaju u isključivu nadležnost Skupštine.

## **Član 22.**

Zamjenik predsjednika Udruženja mijenja predsjednika Udruženja u slučaju njegove nemogućnosti da obavlja poslove i zadatke definisane Statutom, kao i poslove i zadatke koje mu povjeri predsjednik Udruženja.

Zamjenik predsjednika Udruženja ima ista prava, dužnosti i odgovornosti, kao i predsjednik Udruženja u slučaju njegovog odsustva, osim poslova zastupanja Udruženja u pravnom prometu.

Zamjenika predsjednika Udruženja na prijedlog predsjednika Udruženja imenuje Skupština Udruženja.

Mandat zamjenika predsjednika Udruženja vezan je za mandat predsjednika Udruženja.

## **SEKRETAR UDRUŽENJA**

### **Član 23.**

Udruženje ima sekretara.

Sekretara Udruženja na prijedlog predsjednika Udruženja imenuje Skupština Udruženja.

Sekretar Udruženja operativno koordinira rad organa i drugih tijela Udruženja, a posebno se brine za:

- vođenje cjelokupne evidencije Udruženja,
- organizuje nesmetan rad organa Udruženja u tehničkom smislu,
- obavlja ostale administrativne poslove koje mu povjeri predsjednik Udruženja.

Sekretar Udruženja se bira na period od 4 (četiri) godine sa mogućnošću reizbora.

Mandat sekretara Udruženja vezan je za mandat predsjednika Udruženja.

### **Član 24.**

Sekretar Udruženja može biti razriješen dužnosti prije isteka mandata na koji je imenovan i to:

- na sopstveni zahtjev;
- ako pravilno ne obavlja poslove i zadatke povjerene predsjedniku Udruženja;
- u drugim slučajevima predviđenim Zakonom i ovim Statutom.

Inicijativu za razrješenje Sekretara Udruženja može dati 1/3 članova Skupštine ili predsjednik Udruženja.

## **SUD ČASTI**

### **Član 25.**

Sud časti brine o poštovanju zakonskih, profesionalnih i etičkih načela i pravila članova Udruženja.

Članove suda časti biraju se iz reda članova Udruženja, a bira ih Skupština Udruženja.

Ukoliko uoči ili bude izvješten da se članovi Udruženja ne pridržavaju zakonskih propisa, kodeksa kriminalističke, kriminološke profesije i profesije menadžera sigurnosti i ciljeva Udruženja, Sud časti može pokrenuti inicijativu za izricanje mjera predviđenih Statutom.

Postupak pred Sudom časti mogu pokrenuti svi organi Udruženja, pojedini članovi, te oštećena fizička i pravna lica.

Sud časti ima pet članova koji među sobom biraju predsjednika.



Skupština Udruženja bira članove Suda časti na period od 4 (četiri) godine, sa mogućnošću reizbora.

#### **Član 26.**

Sud časti može pokrenuti inicijativu za izricanje mjera:

- javna kritika članu,
- trajno isključivanje iz Udruženja.

Inicijativa se podnosi predsjedniku Udruženja koji donosi odluku u prvom stepenu, dok u drugom stepenu odluku donosi Skupština Udruženja.

### **V ČLANSTVO U UDRUŽENJU**

#### **Član 27.**

Osnivači Udruženja su ujedno i članovi Skupštine koji svojstvo člana Udruženja stiču danom upisa u Registar udruženja.

Članom Udruženja mogu postati državljani Bosne i Hercegovine koji su stekli zvanje kriminaliste, kriminologa ili menadžera sigurnosti i koji prihvate Statut i ciljeve Udruženja.

#### **Član 28.**

Članovi Udruženja mogu biti:

- redovni članovi;
- pridruženi članovi;
- počasni članovi.

#### **Član 29.**

Redovni članovi Udruženja su lica iz člana 28. ovog Statuta, koja su stekla svojstvo člana Udruženja.

Pridruženi član može biti svaka fizička i pravna osoba pomaže Udruženje.

Počasni član može postati fizička i pravna osoba, koja pokaže značajne rezultate u promociji ciljeva i djelatnosti Udruženja.

Za stupanje u članstvo podnosi se pristupnica na propisanom obrascu.

Primljeni član se upisuje u evidenciju članstva.

Udruženje vodi spisak svojih članova. Svaki član Udruženja može pokrenuti postupak pred nadležnim sudom za utvrđivanje ništavnosti opšteg akta Udruženja koji je donesen suprotno odredbama Statuta ili drugog opšteg akta Udruženja, a najkasnije u roku od šest mjeseci od dana donošenja tog akta.

## **PRESTANAK ČLANSTVA**

### **Član 30.**

Članstvo u Udruženju prestaje:

- na vlastiti zahtjev, potpisivanjem izjave o istupanju iz Udruženja;
- isključenjem u slučaju djelovanja u suprotnosti sa ciljevima i Statutom Udruženja;
- smrću člana.

### **Član 31.**

Svaki član Udruženja može slobodno istupiti iz članstva.

Sa odlukom člana Udruženja o istupanju iz članstva, upoznaje se predsjednik Udruženja, nakon čega se vrši evidentiranje istupanja.

### **Član 32.**

Isključenje iz članstva se vrši u slučaju kada član Udruženja teže povrijedi odredbe ovog Statuta ili drugih pravila Udruženja ili ako djeluje protivno ciljevima i interesima Udruženja. Odluku o prestanku svojstva člana Udruženja donosi predsjednik Udruženja, na inicijativu Suda časti Udruženja.

Lice koje je nezadovoljno odlukom predsjednika Udruženja može podnijeti žalbu Skupštini Udruženja u roku od 15 dana od dana prijema odluke.

Skupština razmatra žalbu iz prethodnog stava na prvoj narednoj sjednici i na istoj donosi konačnu odluku.

## **VI PRAVA, DUŽNOSTI I ODGOVORNOSTI ČLANOVA**

### **Član 33.**

Prava članova Udruženja su:

- da biraju organe Udruženja i da u njih budu birani;
- da daju prijedloge, mišljenja i sugestije;
- da prate rad Udruženja i pokreću inicijative za rješavanje pitanja od interesa za Udruženje;
- da budu redovno informisani o radu i rezultatima rada;
- da u zaštiti svojih prava koriste pomoć Udruženja;
- da izvršavaju poslove i obaveze povjerene od strane organa Udruženja;
- da predstavljaju Udruženje kad im organi Udruženja to povjere.

## **Član 34.**

Dužnosti članova Udruženja su:

- da učestvuju u aktivnostima Udruženja;
- da savjesno i odgovorno izvršavaju povjerene poslove i zadatke u vezi sa radom i aktivnostima Udruženja;
- da propagiraju djelatnost Udruženja, a posebno značaj njenih programskih ciljeva;
- da redovno izvršavaju preuzete obaveze prema Udruženju i provode odluke, stavove i zaključke organa Udruženja;
- da uredno i na vrijeme izmiruju članarinu u skladu sa odlukom Skupštine Udruženja;
- da se pridržavaju odredbi ovog Statuta;
- da informišu organe Udruženja o eventualnom neprimjerenom radu drugih članova Udruženja, a tiču se Udruženja.

Oblici odgovornosti članova će se definisati posebnim Pravilnikom koji donosi Skupština Udruženja.

## **VII KOMISIJE I RADNA TIJELA**

### **Član 35.**

Radi svestranog razmatranja i odlučivanja o pojedinim pitanjima iz djelokruga djelatnosti Udruženja, Skupština Udruženja može obrazovati stalne ili povremene komisije, timove, sekcije i druga tijela.

## **VIII PRIHODI I IMOVINA**

### **Član 36.**

Prihodi Udruženja mogu uključivati sljedeće:

- članarine;
- dobrovoljni prilozi i pokloni fizičkih i pravnih lica, kako stranih, tako i domaćih u gotovini, uslugama ili imovini bilo koje vrste;
- državne subvencije i ugovore sa državom, javnim institucijama, fizičkim i pravnim osobama kako domaćim tako i inostranim;
- prihod od kamata, dividendi, dobiti od kapitala, zakupnina, honorara i sličnih izvora pasivnog prihoda; i
- prihod stečen kroz ostvarivanje ciljeva i aktivnosti Udruženja, kako je određeno Statutom.

Ako su osnivači Udruženja javno-pravni organi, oni ne mogu učestvovati u javnim konkursima sa svojim programima i projektima za dodjelu javnih sredstava, već se finansiraju iz drugih izvora, u skladu s odredbama ovog Zakona.

#### **Član 37.**

Ostvarivanje, korištenje i raspolaganje sredstvima Udruženje utvrđuje se finansijskim planom kojeg donosi Skupština na prijedlog predsjednika Udruženja.

O korištenju sredstava, u skladu sa finansijskim planom odlučuje predsjednik Udruženja.

#### **Član 38.**

Nadzor nad korištenjem sredstava vrši Skupština Udruženja.

Skupština je nadležna za kontrolu svih dokumenata, koji se odnose na finansijsko poslovanje, posebno periodičnih, polugodišnjih i završnih finansijskih izvještaja.

Dokumenta iz prethodnog stava Skupština razmatra na redovnoj godišnjoj, a ako je potrebno i vanrednoj sjednici Skupštine, te iste podnosi nadležnim organima u skladu sa Zakonom i drugim propisima i ovim Statutom.

### **IX OBLIK SADRŽAJA PEČATA, ŠTEMBILJA I ZNAKA UDRUŽENJA**

#### **Član 39.**

Udruženje ima svoj pečat.

Pečat Udruženja je okruglog oblika, sa punim nazivom Udruženja upisanim do ivice pečata, i to latiničnim pismom na bosanskom, hrvatskom i srpskom jeziku Udruženje/Udruga kriminalista, kriminologa i menadžera sigurnosti. U sredini pečata nalazi se znak Udruženja. Ispod znaka a do naziva Udruženja nalazi se naznaka sjedišta Udruženja, Sarajevo. Pečat je prečnika 30 mm.

Udruženje može imati više pečata, s tim što svaki mora biti numerisan brojevima.

O čuvanju i upotrebi pečata stara se predsjednik Udruženja.

#### **Član 40.**

Udruženje može imati štambilj, koji je pravougaonog oblika, dimenzija 50x25 mm i sadrži puni naziv Udruženja, kao i prostor za upisivanje broja predmeta i datum zavođenja akta u djelovodni protokol.

#### **Član 41.**

Udruženje ima svoj znak.

Znak Udruženja ima oblik štita i plave je boje. Ivice štita su bež boje, naglašene tamnoplavom sjenom. U centralnom djelu štita nalazi se otvorena knjiga bijele boje i crvenih korica. Iznad knjige nalazi se stilizirani natpis UDRUŽENJE, bijele boje, ispisan latiničnim štampanim slovima. Ispod njega nalaze se četiri stilizirana latinična štampana slova KKMS bijele boje, a simbolišu kriminalistu, kriminologa i menadžera sigurnosti.

### **X ZASTUPANJE UDRUŽENJA**

#### **Član 42.**

Udruženje u pravnom prometu zastupa predsjednik Udruženja u okviru ovlaštenja utvrđenim ovim Statutom i Zakonom.

#### **Član 43.**

U postupcima u kojima Udruženje sudjeluje kao stranka radi ostvarivanja svojih prava, dužnosti i odgovornosti pred nadležnim organima, predsjednik Udruženja može dati pismenu punomoć advokatu za zastupanje ili drugoj stručnoj osobi.

### **XI JAVNOST RADA**

#### **Član 44.**

Rad Udruženja je javan. Javnost rada ostvaruje se neposrednim informisanjem i putem sredstava javnog informisanja za značajnije aktivnosti. Svim članovima omogućit će se uvid u obavljanje aktivnosti na svim područjima na kojima djeluje ovo Udruženje, kao i planiranje daljnjih aktivnosti.

#### **Član 45.**

Članovi Udruženja moraju biti redovno informisani o radu Udruženja. Za javnost rada odgovoran je predsjednik Udruženja.

## **XII POSTUPAK ZA IZMJENU I DOPUNU STATUTA**

### **Član 46.**

Skupština je nadležna za donošenje Statuta, izmjene i dopune Statuta i drugih opštih akata određenih Statutom.

Izmjene i dopune Statuta Udruženja usvaja Skupština, natpolovičnom većinom glasova prisutnih članova.

Inicijativu za izmjene i dopune Statuta može podnijeti 1/3 članova Udruženja ili predsjednik Udruženja.

### **Član 47.**

Udruženje može pored Statuta imati i druge opšte akte.

Organi Udruženja donose opšte akte Udruženja: pravilnike, poslovničke i odluke koji moraju biti u saglasnosti sa Zakonom i ovim Statutom.

## **XIII PRIPAJANJE ILI PODJELA U DRUGO UDRUŽENJE**

### **Član 48.**

Udruženje se može spojiti ili podijeliti u drugo Udruženje.

Spajanje je osnivanje novog udruženja na koje prelazi cjelokupna imovina tri ili više udruženja koja se spajaju. Spajanjem, udruženja prestaju da postoje, a na postupak upisa novonastalog udruženja primjenjuju se odredbe ovog Zakona koje se odnose na osnivanje udruženja.

Udruženje se može podijeliti na dva ili više udruženja. Podijeljeno udruženje prestaje da postoji, a na postupak upisa novonastalih udruženja primjenjuju se odredbe ovog zakona koje se odnose na osnivanje udruženja.

Udruženje može osnovati svoje kancelarije, predstavništva i podružnice u skladu s odredbama Statuta

Odluku iz stava (2) i (3) donosi Skupština nadpolovičnom većinom svih članova Skupštine Udruženja.

## **XIV NAČIN OSTVARIVANJA FINANSIJSKOG IZVJEŠTAJA I IZVJEŠTAJA O RADU**

### **Član 49.**

Udruženje je dužno da vodi poslovne knjige i da podnosi finansijske izvještaje u skladu sa propisima kojima se uređuje računovodstvo neprofitnih organizacija. Godišnji finansijski izvještaj Udruženja podnosi se Skupštini Udruženja na redovnoj godišnjoj sjednici.

Finansijski izvještaj iz stava (1) ovog člana Udruženje je dužno čuvati najmanje pet godina, osim ako posebnim propisom nije utvrđen duži period čuvanja.

Udruženje mora učiniti dostupnim javnosti sve informacije koje se tiču rada i djelovanja Udruženja u skladu sa pozitivnim zakonodavstvom.

#### **Član 50.**

Udruženje prestaje raditi ako:

- Skupština Udruženja donese odluku o prestanku rada ili odluku o spajanju i podjeli; i
- Ukoliko se utvrdi da je Udruženje prestalo djelovati

Udruženje će prestati djelovati kada:

- je proteklo dvostruko više vremena od vremena utvrđenog Statutom Udruženja za održavanje skupštine Udruženja, a Skupština nije održana;
- ukoliko se broj članova Udruženja smanji ispod broja tri, a skupština Udruženja u roku od tri mjeseca od nastupanja ove okolnosti ne donese odluku o prijemu novih članova Udruženja;
- se broj članova upravnog odbora Udruženja smanji ispod broja tri;
- nije moguće promijeniti statut Udruženja.

Lice ovlašteno za zastupanje Udruženja dužno je u roku od 30 dana od dana kada je Udruženje prestalo djelovati u skladu sa stavom (1) ovog člana dostaviti Ministarstvu zahtjev s dokazima o prestanku rada Udruženja.

Kada Ministarstvo uvrdi činjenice iz st. (1) i (2) ovog člana, donosi rješenje o prestanku rada Udruženja.

#### **Član 51.**

Udruženje prestaje sa radom po sili Zakona u skladu sa članom 50. Statuta Udruženja

### **XV ZAVRŠNE ODREDBE**

#### **Član 52.**

Tumačenje odredbi ovog Statuta daje Skupština Udruženja.

#### **Član 53.**

Ovaj Statut stupa na snagu danom donošenja, a primjenjivaće se od dana upisa u Registar udruženja kod nadležnog ministarstva.

**Član 54.**

Stupanjem na snagu ovog Statuta, prestaje da važi Statut broj: 03/13 od 18.01.2013. godine.

**BROJ:** 04/19

**DATUM:** 26.08.2019

**M.P.**

**PREDSJEDNIK SKUPŠTINE**

---

**Adnan Fazlić**